

दिनांक 24.04.2025

समय: 18.45 बजे

आकाशवाणी जयपुर-अजमेर
प्रादेशिक समाचार

- प्रधानमंत्री नरेन्द्र मोदी कह्यो-पहलगाम आतंकी हमला रा दोषियां ने करड़ी सज़ा दी जावेला-सरकार राष्ट्रपति ने पूरी जाणकारी दीनी।
- पहलगाम आतंकी हमला रे खिलाफ प्रदेश मांय आज ई प्रदर्शन करी ज्या अर श्रद्धांजलि सभावां राख्यी ज्यी-पाकिस्तान ऊं लाग्योड़ी सरहद माथे सावचेती बधायी ज्यी।
- खसरा-रुबेला बीमारी ने खत्म करण रा अभियान री आज सरुआत-बच्चां ने आं बीमारियां ऊं बचावण सारु जागरुकता रा केई कार्यक्रम राख्या जावेला।
- प्रदेश मांय ज़ोरदार गर्मी रो दौर जारी -काल ऊं राज्य रा आतूणी हलकां मांय लू रो दौर सरु व्हेवण रा आसार।

000

प्रधानमंत्री नरेन्द्र मोदी कह्यो है के भारत हर आतंकी अर वां री मदद करण वाळां री पिछाण करेला अर पहलगाम हमला रा दोषियां ने सज़ा दी जावेला। वे आज बिहार रा मधुबनी मांय राष्ट्रीय पंचायती राज दिवस रे मौके राख्यी ज्यी जनसभा मांय बोल रह्या हा। श्री मोदी कह्यो के आतंकी वारदातां ऊं देश री आत्मा नी टूटेला। प्रधानमंत्री कह्यो के आतंकवादियां रो हमलो केवल सैलाणियां माथे नी व्ह्यो, बल्कि भारत री आत्मा माथे व्ह्यो है।

प्रधानमंत्री कह्यो के आतंकवादियां ने नी बख्शा जावेला अर भारत दुनिया रा किण ई कोना ऊं ई हमला रा अपराधियां ने दूढ़ निकाळेला। श्री मोदी कह्यो के न्याय तैय करण सारु हर संभव कोशिशें करी जावेला अर पूरो देश ई संकल्प माथे अडिग है। वे ज़ोर दे र कह्यो के इन्सानियत मांय भरोसो राखण वाळो हर कोई भारत सागे है। श्री मोदी भारत रा प्रति एकजुटता बतावण सारु दुनिया भर रा नेतावां रो धन्यवाद कीनो। प्रधानमंत्री मधुबनी ऊं तेरह हजार 480 करोड़ रुपया ऊं बत्ता खर्च वाळी विकास री केई परियोजनावां री सरुआत कीनी। ई मौके वे आठ सौ 70 करोड़ रुपया रा खर्च वाळी रेल परियोजनावां रो उद्घाटन कीनो अर चार रेलगाड़ियां ने झंडी बतायी। श्री मोदी झंझारपुर रा बिदेश्वर मांय पंचायतां रा बेहतरीन काम सारु पंचायती राज रा नुमाइन्दां रो मान ई कीनो।

000

गृहमंत्री अमित शाह अर विदेश मंत्री एस. जयशंकर जम्मू-कश्मीर रा पहलगाम दौरा पाछे आज राष्ट्रपति द्रौपदी मुर्मू सागे मुलाकात कर र आज वां ने पूरी जाणकारी दीनी। राष्ट्रपति ने हिफाज़ती दस्तां री कार्यवाही अर सरकार रा जतन रा बारा मांय जाणकारी दीरीजी। ई बीचे विदेश मंत्रालय आज जर्मनी, जापान, पोलैंड अर रूस रा राजदूतां ने बुला र पहलगाम आतंकी हमला री जाणकारी दीनी।

000

केन्द्र सरकार पहलगाम आतंकी हमला ऊं उपजा हालात रा बारा मांय आज दिल्ली मांय सगळी सियासी पार्टियां रा नेतावां री मीटिंग बुलायी है। मीटिंग मांय रक्षा मंत्री राजनाथ सिंह सियासी पार्टियां रा नेतावां ने हमला ऊं जुड़ी जाणकारियां देवेला। वे ई वारदात पाछे पाकिस्तान रे खिलाफ उठायी ज्या कदमां रा बार मांय ई जाणकारी देवेला।

ई बीचे पहलगाम आतंकी हमला रे खिलाफ भारतीय जनता पार्टी रा ओहदादार, नेता अर कार्यकर्ता आज नई दिल्ली मांय पाकिस्तान रा उच्चायोग सामी प्रदर्शन कीनो। दूजी कानी कांग्रेस कार्य समिति ई आज दिल्ली मांय पार्टी रा ओहदादारां री मीटिंग बुला र पहलगाम आतंकी हमला री करड़ी निन्दा कीनी। मीटिंग पाछे खबरनवीसां सागे बातचीत करता थकां कांग्रेस रा महासचिव के. सी. वेणुगोपाल इण ने देश रा मूल्यां माथे सीधो हमलो बतायो। कांग्रेस कार्य समिति शांति री अपील करता थकां मुश्किल बगत मांय एकजुटता री पुष्टि कीनी।

ई बीचे भारत पहलगाम आतंकी हमला पाछे पाकिस्तान रा लोगां सारू वीजा सेवा तुरत निलंबित करण रो फैसलो कीनो है। पाकिस्तान रा सगळा मौजूदा वैध वीजा ई 27 अप्रैल ऊं रद्द कर दिया जावेला। ई सागे ई पाकिस्तानी नागरिकां ने ईलाज सारू जारी करी ज्या वीजा ई 29 अप्रैल ताई ई वैध रेहवेला। विदेश मंत्रालय रे मुजब भारत मांय मौजूद सगळा पाकिस्तानी नागरिकां ने वीजा री तैय मियाद ऊं पैली भारत छोड़णो व्हेला। सरकार भारत रा लोगां ने ई पाकिस्तान री यात्रा नी करण री राय दीनी है। सरकार पाकिस्तान मांय मौजूद भारत रा लोगां ऊं तुरत पाछा आवण सारू कह्यो है। ई बीचे, सरकार पाकिस्तानी एक्टर फवाद खान री एक्टिंग वाळी फिल्म अबीर गुलाल ने भारत मांय रिलीज करण परां रोक लगा दीनी है। आरती एस बागड़ी रा निर्देशन मांय बणी आ हिन्दी फिल्म 9 मई ने सिनेमाघरां मांय लागण वाळी ही।

000

पहलगाम आतंकी हमला रे खिलाफ प्रदेश मांय ई न्यारा-न्यारा संगठनां अर संस्थावां री ओर ऊं आज ई विरोध प्रदर्शन अर श्रद्धांजलि रा कार्यक्रम राख्यी ज्या। वारदात रे खिलाफ जयपुर मांय कारोबारियां रा संगठनां अर खुद सेवक संगठनां री ओर ऊं मार्च निकाळ र प्रदर्शन करी ज्यो।

भरतपुर रा शहीद स्मारक माथे जनता मोमबत्तियां जळा र पहलगाम आतंकी घटना री निन्दा कीनी। ई दौरान कारोबारी काळी पट्टी बांध र दुःख जतायो। जिला मुख्यालय माथे प्रार्थना सभा राख र ई हमला मांय मरण वाळां री आत्मा री शांति सारू मौन राख्यी ज्यो। सवाईमाधोपुर मांय हम्मीर चौक माथे लोग तिरंगा झण्डा हाथ मांय ले र ई वारदात मांय जान गंवा देवण वाळां री आत्मा री शांति री प्रार्थना कीनी। झालावाड़ मांय बार एसोसिएशन री ओर ऊं विरोध रैली निकाळी ज्सी अर जिला कलेक्टर ने पानडी संपी ज्यी। राजस्थान हाईकोर्ट री जोधपुर पीठ मांय वकील प्रदर्शन कर र सरकार ऊं पहलगाम आतंकी हमला रा ज़िम्मेदार लोगां रे खिलाफ करड़ी कार्रवाई री मांग कीनी। ई बीचे, हमला मांय मर्या जयपुर रा रेहवासी नीरज उधवानी रो आज पूरा मान सागे दाग कर दियो ज्यो। राज्यपाल हरिभाऊ बागडे, विधानसभा अध्यक्ष वासुदेव देवनानी, मुख्यमंत्री भजनलाल शर्मा, केन्द्रीय मंत्री गजेन्द्र सिंह शेखावत अर राज्य मंत्रिमंडल रा सदस्य उधवानी ने श्रद्धांजलि दीनी। मुख्यमंत्री इण ने कायराना हरकत बताता थकां भरोसो जतायो के ई हमला रा दोषियां ने करड़ी सजा दी जावेला।

राज्य रा पैली वाळा मुख्यमंत्री अशोक गहलोत अर कांग्रेस रा प्रदेश अध्यक्ष गोविंद सिंह डोटासरा ई उधवानी रा पिरवार वाळां ने सांत्वना दीनी। उधवानी रा दाग मांय मोटी तादाद मांय जनता अर मान्योड़ा लोग मौजूद रह्या। पहलगाम आतंकी हमला पाछे प्रदेश मांय ई सावचेती बधा दीरीजी है। पुलिस रा जवान आज केई ठौड़ां फ्लैगमार्च कीनो अर होटलां मांय रुकण वाळां री जांच करी ज्यी। पाकिस्तान ऊं लाग्योड़ी अंतर्राष्ट्रीय सरहद माथे ई बी.एस.एफ. चौकसी बधा दीनी है। म्हाणा जैसलमेर खबरनवीस बतायो के जिला मुख्यालय माथे ई पुलिस री ओर ऊं आज जांच रो अभियान चलायी ज्यो।

000

000

केंद्रीय स्वास्थ्य मंत्री जगत प्रकाश नड्डा आज नई दिल्ली मांय साल 2025-26 सारू खसरा-रुबेला री बीमारियां ने खत्म करण रा अभियान री सरूआत कीनी। ई मौके श्री नड्डा कह्यो के ई साल री पहली तिमाही ताई देश रा 322 जिलां मांय खसरा रा जद के 487 जिलां मांय रुबेला रो कोई मामलो नी मिल्यो है।

000

आज राष्ट्रीय पंचायती राज दिवस मणायी ज्यो। आज ही रा दिन साल 1992 मांय 73वां संविधान संशोधन कानून रा तैत पंचायतां ने स्थानीय स्वशासन रा तौर ऊं संवैधानिक दर्जो दियो ज्यो हो। ई मौके राज्य मांय ई न्यारा-न्यारा कार्यक्रम राख्यी ज्यो। ग्राम पंचायतां मांय जागरूकता कार्यक्रम राख्यी ज्यो अर बिहार रा मधुबनी मांय राख्यी ज्यो राष्ट्र स्तर रा कार्यक्रम रो सीधो प्रसारण करी ज्यो। सरहदी जिला जैसलमेर मांय हरियाळो राजस्थान अर एक पेड़ मां के नाम थीम माथे राख्यी ज्यो कार्यक्रम मांय वठे रा जनता रा नुमाइंदा पंचायतां मांय पौधा रोप्यो।

000

शिक्षा मंत्री मदन दिलावर कह्यो है के शिक्षा मांय संस्कारां रो समावेश जरूरी है अर पिरवार, स्कूल अर चोखी संगत ऊं ई संस्कार हासिल कर्या जा सके है। वे आज बीकानेर मांय राख्यी ज्यो एक कार्यक्रम मांय बोल रह्यो हा। श्री दिलावर कह्यो के देश रा हर रेहवासी मांय श्रद्धा, भक्ति अर मान रो भाव व्हेवणो चाहिजे। कार्यक्रम मांय पॉलिथीन काम नी लेवण री शपथ लीरीजी। ई सागे ई वॉकेथोन रे जरिये पर्यावरण बचावण रो संदेश दियो ज्यो।

000

प्रदेश रा घणखर हलकां मांय जोरदार गर्मी पड़ रही है। राज्य रा आतूणी हलकां मांय पड़ रह्यो जबरदस्त तावड़ा ऊं जिन्दगी माथे घणो असर पड़ रह्यो है। जैसलमेर अर बाड़मेर जिलां मांय आज आखा दिन उन्नो बायरो बाजतो रह्यो। चूरू मांय ई चिलचिलाती धूप रे कारण सड़कां सुनसान निजर आयी। अलवर मांय 8 वीं कक्षा ताई रा बच्चां सारू स्कूल रो बगत संवारे साढे सात ऊं साढे ग्यारह बज्यां ताई कर दियो ज्यो है। राज्य मांय आज सब ऊं बत्तो तापमान 44 दशमलव 8 डिग्री सेल्सियस बाड़मेर मांय दर्ज करी ज्यो। मौसम महकमा रे मुजब आवता दो-तीन दिन मांय पारो 2 ऊं 3 डिग्री सेल्सियस ताई और चढ़बा रा आसार है। काल ऊं प्रदेश रा पाकिस्तान ऊं लागता हलकां मांय पारो 45 डिग्री सेल्सियस रे आरे-सारे पूग जावण री शंका है।

000

आदिवासियां री बहुतायत वाळो डूंगरपुर जिला लारला माली साल मांय महात्मा गांधी नरेगा रा तैत काम करावण मांय प्रदेश मांय अव्वल रह्यो। जिला मांय मनरेगा रा तैत साल 2024-25 मांय 62 हजार ऊं बत्ता पिरवारां ने 100 दिन रो काम दियो ज्यो। जिला कलेक्टर अंकित कुमार सिंह बतायो के मनरेगा ऊं स्थानीय स्तर माथे काम-धंधा रा मौका बध्या जिण ऊं अठे रा लोगां रो गुजरात अर दूजा राज्यां मांय जावणो रूक ग्यो।

000

अग्नि शमन सुरक्षा सप्ताह रा तहत प्रदेश मांय आज ई केई कार्यक्रम राख्यी ज्यो। 21 अप्रैल ऊं चाल रह्यो ई सप्ताह रे दौरान लोगां ने आगजनी री घटनावां रा कारण, रोकथाम अर बचाव रा उपायां री जाणकारी दी जा रही है। झुंझुनूं रा जिला अस्पताल मांय आज आग बुझावण रो अभ्यास करी ज्यो। चिकित्सा अर स्वास्थ्य अधिकारी डॉ. जितेन्द्र भांबू बतायो के अभ्यास रे दौरान अस्पताल रा आग बुझावण रा बूता री परख करी ज्यो।

000